

■ TRIBUNA POLITICA

Politica agricola: Ins na turna betg pli enavos

DA SILVA SEMADENI,
CUSSEGLIERA NAZIUNALA PS/GR

Da tantas varts resuna la medema melodia: L'iniziativa populara «Per la segirtad alimentara» da l'Uniun purila svizra (UPS), che para a prima vista acceptabla, è percunter inutila e schizunt nuschaivla per l'avegnir da l'agricultura. Malgrà tut mia simpatia per il mund puril, era jau cundivid questa posiziun. E quai per questa raschun.

La Constituziun federala ed er ils fatgs cumprovàn: La segirtad alimentara en Svizra è garantida. En ils ultims decennis è s'augmentada la produziun indigena. L'agricultura svizra na ha anc mai produci tant sco oz – conferma l'Uffizi federal d'agricultura. E quai schebain che uschè blier terrain cultivà è vegnì consumà dal svilup da construcziun. Il grad d'autoprovvediment surpassa il 60%, in nivel pli aut che durant la Segunda Guerra mundiala cun il plan Wahlen. Nossa agricultura, oravant tut quella en las regiuns da la Bassa, è oz intensiva e cumplettamain mecanisada. Ella cuntanscha in'auta productivitat mo grazia a considerabels imports da pavel concentrà e da carburants. Dapli produziun vul dir uschia da-



pli agricultura intensiva – e quai na dastga betg esser la finamira da la politica agrara svizra.

En ils davos onns ha prendì il parlament cun la politica agrara 2014–2017 pliras decisiuns impurtantas che signifitgan era modesti svilups en la promoziun da la diversità biologica. Quels èn impurtants. La confederaziun ha fixà e publictà las finamiras ecologicas per l'agricultura en il 2008, ma enfin oz n'èn ellas anc betg vegnidas realisadas. La situaziun da la biodiversità è alarman-ta, repetan ils scenziads dapi onns. Nus spetgain cun impazienza mesiras inditgadas per reducir la contaminaziun cun pesticids dal terren e da las auas. Problematic per la sanadad umana è plinavant il diever d'antibiotica en las stallas. Spezialmain pervi da questa bilantscha ecologica tut auter che satisfacenta ins na dastga betg pretender

in'agricultura anc pli intensiva

Il princip da la segirtad alimentara, da la produziun persistenta e da la defensiun dal terren cultivà èn gia francads en la Constituziun federala e vegnan realisads cun las leschas ch'èn en vigur. Quai vala era per la strategia da qualitat che vegn applitgada il meglier e cun success da l'agricultura biologica sco p. ex. en noss chantun. Il nov artitgel costituziunal da l'UPS pretenda novas leschas entaifer dus onns. Quai cumprometta la politica agricola actuala e creescha durant onns malsegirtad, propi insatge ch'ìls purs n'han betg da balsegn. È quai la finamira da l'iniziativa da l'UPS, la finamira da turnar enavos ed annullar ils progress realisads – intgins encunter sia voluntad – cun la politica agrara 2014–2017?

L'agricultura ed ils purs stattan a cor a mai, era mia biografia è segnada dal mund agricul, dal mund alpester. Jau sai che las sfidas èn multifaras. La resposta a questas sfidas n'è però betg in nov artitgel costituziunal, dentant l'applicaziun ed il svilup coerent da la nova politica agrara 2014–2017 e da las leschas existentas che garanteschan era l'existenza da manaschis agriculs da muntogna.